

四庫全書

史部

欽定四庫全書

遼史拾遺卷五

錢塘 厲鶚 撰

本紀第六

穆宗孝安正敬皇帝諱璟小字舒嚕

資治通鑑曰帝更名明契丹國志曰帝年少好遊  
戲不親國事每夜酣飲達旦乃寐日中方起國人謂  
之睡王

應歷元年 秋九月遣劉承訓告哀于漢

十國春秋曰北漢乾祐四年秋九月遼遣劉承訓來告哀帝命樞密直學士王得中如遼賀即位復以叔父事之請兵以擊晉州隨使如遼行弔禮

冬十月

契丹國志曰冬十月遼遣蕭伊濟將奚遼兵三萬會北漢兵伐周攻晉州周太祖自將由澤州與王峻會兵救之十二月峻至晉州遼兵夜遁 十國春秋曰

乾祐四年冬十月遼遣彰國軍節度使蕭伊濟率兵五萬來會漢帝帥兵二萬出陰地關攻晉州丁未軍於城北三面置寨周巡檢使王萬敢龍捷都指揮使史彥超虎捷指揮使何徽帥兵拒之十二月乙巳王峻引兵救晉州晉州南有蒙阮最險要峻憂漢兵據之是日聞前鋒已度蒙阮喜曰吾事濟矣漢帝攻晉州不克會大雪軍士乏食契丹兵思歸聞峻至燒營夜遁峻入晉州契丹兵至晉陽士馬什喪三四伊濟恥

無功釘大將一人于市旬日而斬焉

二年春正月戊午朔南唐遣使奉蠟丸書及進犀兕甲  
萬屬

陸游南唐書曰元宗嗣位遣使者公乘鎔航海繼好既  
至而契丹主烏雲被殺弟舒魯遣元宗書大契丹天  
順皇帝謹致書大唐皇帝闕下貴朝使乘鎔等自去  
秋已達東京海岸適遭國禍今年二月二十六日部  
署一行并諸儀物兵鎧已至燕京茲蒙敦念先朝踐

修舊好既增摧痛又切感銘貴長直官王朗陳纂取  
間道先回用附咨報公乘鎔等已遣伴送使陳植等  
同回止俟便風即令引道而公乘鎔等亦以蠟封帛  
書其詞曰臣鎔自去年六月離罌油七月至鎮東關  
遣王朗奉表契丹九月乃有番官額爾奇木部牛車百  
餘乘及鞍馬沿路置頓十月至東京留三日契丹主  
遣閑廐使王廷秀稱詔勞問兼述泰寧王燕王九  
月同行大事烏雲即世母妻并命又遼東以西水潦

壞道數百里車馬不通今年正月方至幽州館於愍  
忠寺先迎御容入宮先欲識唐皇帝面乃引見倣舊  
儀問國書中機事臣即述奕世歡好當謀分裂之事  
契丹主喜問復有何事臣云軍機別有密書契丹主  
接置袖間乃云吾與唐皇帝一如先朝往來因置酒  
合樂又諭臣曰使人遠汎巨海而至不期骨肉間倏  
起此事道路所聞亦必憂恐手斟一玉鐘酒先自啜  
乃以勸臣令歡酬自旦至日晡始罷自是數遣使宣

勞三日一賜食謹遣王朗齋散號子歸聞奏散號子不知何等語也

夏四月

冊府元龜曰廣順二年四月定州言契丹羽林部署辛霸卿等三十三人馬三匹來奔

六月壬辰國舅政事令蕭默赫特宣政殿學士李幹等謀南奔事覺詔暴其罪

資治通鑑曰廣順二年六月己亥太子賓客李濤之



弟澣在契丹為勤政殿學士與幽州節度使蕭哈濟  
契丹主烏雲之妻弟也澣說哈濟內附哈濟欣然許  
之澣因定州謀者田重霸齎絹表以聞且與濤書言  
契丹主童蒙專事宴游無遠志非前人之比朝廷若  
能用兵必克不然與和必得二者皆利於速度其情  
勢他日必不能力助河東者也

河東謂  
北漢

壬寅重霸至

大梁會中國多事不果從 冊府元龜曰李澣初仕  
晉為翰林學士晉末契丹犯闕明年春隨廬帳北行

契丹主永康王善待之永康入國以澣華人不令隨  
從留住幽州供給亦厚永康為舍音所殺舒嚕代立  
部族首領多被戮永康妻弟曰蕭哈濟亦謂之楚德  
錫里為幽州節度使與澣相善每與澣言及中國  
意深慕之澣嘗以微言挑之欣然遂納會定州節  
度使遣謀者田重霸繼往幽州偵邏軍事每令潛至  
澣所密謀還計澣亦致書於定帥致謝定帥表其事  
太祖哀澣羈離異域嘗有南歸之意乃令田重霸齎

詔賜之魚令幹兄太子賓客濤密通家問幹得詔甚  
感太祖恩因重霸迴致謝曰重霸至伏蒙恩慈特頒  
明詔降日中之文字慰天外之流離別述宸慈俾傳  
家信如見骨肉倍感君親又奏陰事曰昨田重霸至  
為無與蕭哈濟詔敕祇有兄濤家書不敢將出方欲  
遣田重霸却回至五月四日哈濟差中門使趙珮傳  
語臣云昨擬差人齎絹書上南朝皇帝請發兵來魚  
取得姚漢英等奏狀所貴聽信其絹文印押了未封

被趙珮懷內遺失交下憂怕不知所為臣既認實心  
遂喚趙珮通事嘉哩來呈與書詔當時聞於哈濟極  
喜引臣竊謝尋喚重霸於私宅相問至五月二十六  
日又喚重霸於衙內一宿今月四日令趙佩將銀十  
兩令與重霸兼傳語與臣云我心如鐵石但令此人  
且迴諸事宿時說與一一令口奏候南朝有文字來  
則別差人去至于機事兵勢權謀非臣愚能為敢  
陳鄙欸伏乞妙延良弼周訪嘉謀斷於宸衷用叶廟

勝又與濤書言契丹舒嚕事云今皇驕驕唯好擊鞠  
耽於內寵無四方之志觀其事勢不同已前親密貴  
臣尚懷異志即微弱可知不敢備奏一則煩文一則  
恐涉為身計大好乘其亂弱之時計亦易和若辦得  
來討唯速若且和亦唯速將來必不能力助河東也

秋九月

資治通鑑曰廣順二年九月契丹將高謨翰以葦棧  
渡胡盧河入寇至冀州成德節度使何福進遣龍捷

都指揮使劉誠誨等屯貝州以拒之契丹聞之遽引兵北渡所掠冀州丁壯數百人望見官軍爭鼓譟欲攻契丹官軍不敢應契丹盡殺之

冬十月

契丹國志曰應歷二年冬十月遼瀛節幽州大水流民入塞者四十萬口冊府元龜曰廣順二年十月契丹鈞臺鎮將王彥鎮都將盧曉文招收軍使王瓊等八人來奔

十一月

冊府元龜曰十一月契丹界關南都船務使王希乾  
寧軍使孫章而下二十四人來奔 又曰契丹殿頭  
王進龍武羽林軍校及通事舍人胡延等六人來奔  
三年春正月

冊府元龜曰廣順三年春正月定州言契丹三千攻  
圍義豐軍遣定州都指揮使楊弘祐選兵二百夜斫  
寨殺蕃酋烏遜以下六十人得馬八匹契丹遁去

又曰廣順三年正月契丹王子元祿二入羽林軍使  
王遇軍將張超等十六人來奔

二月 三月

冊府元龜曰廣順三年二月鎮州言部送契丹來奔  
銀院使等七人三月契丹羽林軍士十五人來奔

十國春秋曰乾佑六年三月庚辰朔南唐遣使貢遼  
因附書于漢遼主詔達其貢

夏四月 五月 六月



冊府元龜曰廣順三年夏四月契丹乾寧軍使張韜等三十八人羽林軍將王興等十五人來奔五月深州送契丹來奔魏院官李緒等十七人指揮使李重筠等十人為儀四十人至京師六月契丹瀛州戍軍陶洞交等十二人及巡檢指揮使葛知友雲州牙將崔崇等十九人招收軍使李彥暉等二十一人來奔是月定州送奚契丹來奔繡院使邢福順等十三人并順州刺史戴原等赴闕

秋七月 八月 九月

冊府元龜曰七月契丹羽林軍士楊士澤等十三人  
殺直楊晏得等二十五人來奔是月滄州李暉送契  
丹降人蘆臺軍使張藏英等二百二十二人馬二十  
三匹八月定州部送契丹歸明軍士齊武等二十九  
人至京師九月雲州吐渾指揮使黨富達等五十一  
人馬馳四十二并朔州軍使馬延嗣等來奔 五代  
史曰馮玉從出帝入契丹契丹以為太子太保周廣

順三年其子傑自契丹逃歸玉 以憂卒

四年春二月丙午朔周攻漢命政事令耶律達魯援之  
資治通鑑曰周顯德元年北漢主聞太祖晏駕謀大舉  
入寇遣使請兵于契丹二月契丹遣武定節度使政  
事令楊衮將萬餘騎如晉陽北漢主自將兵三萬以  
白從暉為行軍都部署張元徽為前鋒都指揮  
使自團南趨潞州昭義節使李筠遣其將穆令  
均將步騎二千逆戰筠自將大軍壁於太平驛張

元徽與令均戰陽北令均逐之伏發殺令均筠遁歸  
上黨嬰城自守筠即李榮也避上名改焉世宗聞北  
漢主入寇欲自將兵禦之羣臣皆曰陛下新即位山  
陵有日人心易搖不宜輕動帝曰以吾兵力之強破  
劉崇如山壓卵耳三月乙卯朔北漢乘勝進逼潞州  
丁丑詔天雄節度使符彥卿引兵自磁州固鎮出北  
漢兵後以鎮寧節度使劉崇副之又詔河中節度使  
王彥超引兵自進州東出邀北漢以保義節度使韓通

副之又令馬軍都指揮使樊愛能步軍都指揮使何徽義成節度使白重贊鄭州防禦使史彥超前耀州團練使符彥能將兵先趣澤州宣徽使向訓監之壬辰軍過澤州癸巳前軍與北漢軍遇擊之北漢主以中軍陳於巴公原張元徽軍其東楊衮軍其西衆頗嚴整北漢主見周軍少悔召契丹謂諸臣曰吾自用漢軍可破也何必契丹今日不惟克周亦可使契丹心服諸將皆以為然楊衮策馬前望周軍謂北漢主曰

勅敵也未可輕進北漢主奮髯曰時不可失公勿言  
時東北風方盛俄而忽轉南風北漢樞密副使王延  
嗣使司天監李義白北漢主云時可戰矣樞密直學士  
王得中扣馬諫曰義可斬也風勢如此豈助我者耶  
北漢主曰吾計已決老書生勿妄言且斬汝麾東軍  
先進張元徽將千騎擊周右軍樊愛能何徽引騎兵  
先遁右軍潰步兵千餘人解甲呼萬歲降于北漢帝  
見軍勢危自引親兵犯矢石督戰太祖皇帝時為宿

衛將與張永德各將二千人進戰馳犯其鋒士卒死戰無不一當百北漢兵披靡內殿直馬仁瑀躍馬引矢大呼連斃數人殿前右番行首馬全义引數百騎進陷陣北漢主知帝自臨陣褒賞張元徽趙使乘勝進兵元徽前畧陣馬倒為周兵所殺元徽北漢之驍將也北軍由是奪氣時南風益盛周兵爭奮北漢兵大敗北漢主自舉赤幟以救兵不能止楊衮畏周兵之盛不敢救且恨北漢主之語全軍而退時北漢主尚

有衆萬餘人阻澗而陳薄暮劉詞至復與諸軍擊之  
北漢兵又敗殺王延嗣追至高平僵尸滿山谷委棄  
御物及輜重器械雜畜不可勝紀丁酉北漢主自高  
平被褐戴笠乘契丹所贈黃驢帥百餘騎由雕窠嶺  
遁歸宵迷俘村民為導誤之晉州行百餘里乃覺殺  
導者晝夜北走所至得食未舉筋或傳周兵至蒼黃  
而去北漢主衰老力憊伏于馬上晝夜馳驟殆不能  
支僅得入晉陽五代史曰旻歸為黃驢治廐飾以



金銀食以三品料號自在將軍

夏五月乙亥忻代二州叛漢遣南院大王塔拉助達魯討之丁酉塔拉敗周將符彥卿於忻口

十國春秋曰壬寅周以符彥卿為河東行營都部署郭崇副之向訓為都監李重進為馬步都虞候史彥超為先鋒將步騎二萬發潞州入寇又命王彥超韓通自陰地關入與彥卿合又以劉詞為隨駕都部署白重贊副之夏四月庚午周主發潞州超太原癸酉

忻州監軍李勅叛殺漢刺史趙臯及遼通事楊諾衮  
舉城降周周以勅為忻州刺史五月乙亥遼遣南院  
大王塔拉來援丙子周主至太原旗幟環城四十里  
是日代州防禦使鄭處謙舉城降周先是楊衮疑處  
謙有二心使騎兵守城門處謙殺之閉門拒衮衮奔  
歸遼遼主以其無功囚之處謙遂叛丁丑周置靜塞  
軍于代州以處謙為節度使契丹屯數千騎于忻代  
間為漢援兵庚辰周主遣符彥卿擊之彥卿擊入忻

州契丹退保忻口丁酉塔拉敗彥卿于忻口周代州  
將桑珪等誣鄭處謙通遼殺之周將史彥超與契丹  
戰死周主初來攻晉陽彥卿彥超北控忻口以斷契  
丹援路而晉陽城方四十里周師去城三百步圍之  
數匝百計攻之不能克彥卿既數為契丹所挫至是復  
以身殉周主于是徵懷孟蒲陝丁夫數萬亟攻晉陽  
會久雨士卒皆罷病乃議引還

秋七月

馬令南唐書曰保大十二年秋七月契丹使其舅來  
聘昇元中宋齊邱選宮嬪雜以珠貝羅綺泛海北通  
契丹欲賴之以復中原而契丹使至則厚幣遣還迨  
至淮北輒使人刺之復遣使汾海齎琛寶以報聘契丹  
意晉人殺其使數犯中原至是館契丹使于清風驛夜  
譙更衣盜斬其首契丹自此不至蓋中原間之也

陸游南唐書曰初宋齊邱謀間晉會契丹使燕人高  
霸來聘歸至淮北唐陰遣人刺殺之霸有子乾從行

匿之濠州於是契丹信以為霸之死出於晉人保大  
十二年舒嚕遣其舅來夜晏清風驛已更衣忽仆於  
地視之失其首矣厚賞捕賊不得久乃知周大將荆  
罕儒知契丹使至思遣客刺之以間唐乃下令能得  
吾枕者賞三百緡俄有劍客田英得之即給賞如約  
仍屏人語之曰能得江南番使頭賞三千緡英果得  
之自是唐與契丹遂絕

五年 冬十一月乙未朔漢主宗殂子承鈞遣使來告

且求嗣立遣使弔祭遂封冊之

王保衡晉陽見聞錄曰甲寅年春漢主旻南伐敗歸  
夏周師攻圍旻積憂勞成心疾是冬卒鈞即位丁巳  
年正月旦改乾祐十年為天會元年 冊府元龜曰

後漢劉崇周廣順元年以河東節度使僭號于太原稱  
漢改名旻仍以乾祐為年號崇卒子鈞襲偽位 鶚

案吳氏十國春秋大定錄紀年通譜遼史周世宗  
實錄薛居正五代史俱云崇死于乙卯年惟王保衡

故旻舊臣言當足信崇應以應歷四年冬十一月殂  
契丹國志曰冬十一月北漢主旻殂承鈞告哀于  
遼遼冊命為帝其事遼上表稱男遼賜詔謂之兒皇  
帝

七年春二月辛酉南唐遣使奉蠟丸書

胡三省資治通鑑注曰自徐溫執吳政屢汎海使契  
丹欲與共圖中國至唐烈祖及中主皆然

冬十一月

十國春秋曰北漢天會元年十一月遼遣大同節度使侍中高勲將兵會李存瓌擊周至潞州城下而還帝知契丹不足恃而不敢遽絕贈勲甚厚

十二月

十國春秋曰天會元年十二月唐使者陳處堯

十國紀年

作兵部郎中段處常晉陽見聞錄云陳處堯如契丹乞兵因來游今從其說

自契來游太

原漢帝厚禮之留數日北還陸游南唐書曰段處

常失其鄉里家世保大中為兵部郎中周侵淮南元



宗命處常浮海使契丹乞援處常為契丹陳利害甚  
悉契丹雖通本國徒持虛辭利南方茶藥珠貝而已  
至是了無出師意而留處常不遣處常怨其無信誓  
死國事數面誚契丹主契丹主亦媿其言優容之以  
病卒于契丹

八年 夏五月

契丹國志曰五月朔日食

九年 夏四月丙戌周來侵戊戌以南京留守蕭思溫

為兵馬都總管擊之是月周拔益津瓦橋淤口三關五月  
乙巳朔瀛莫二州

資治通鑑曰周顯德六年夏四月庚寅韓通奏自滄  
州治水道入契丹境柵于乾寧軍南補防開游口三  
十六遂通瀛莫辛卯上至滄州即日率步騎數萬發滄  
州直趨契丹之境壬辰至乾寧軍契丹寧州刺史王  
洪舉城降乙未大治水軍分命諸將水陸俱下以韓  
通為陸路都部署太祖皇帝為水路都部署丁酉

上御龍舟沿流而北舳艫相連數十里己亥至獨流  
口汭流而西辛丑至益津關契丹守將終廷輝以城  
降自是以西水路漸隘不能勝巨艦乃舍之癸卯入  
瓦橋關契丹莫州刺史劉楚信瀛州刺史高彥暉皆  
舉城降於是關南悉平 司馬光涑水紀聞曰張藏  
英燕人父為人所殺藏英尚幼稍長擒讐人生鬻割  
以祭父然後食其心肝鄉人謂之報讐張孝子契丹  
用以為蘆臺軍使逃歸中國從世宗征契丹藏英請不

用兵先往說下瓦橋關乃單騎往城下呼曰汝識我  
乎張蘆臺也因陳世宗威德曰非汝敵也不下且見  
屠藏英素為燕人所信重契丹遂自北門遁去城中  
人開門請降王稱東都事畧曰姚內斌盧龍人也  
少仕契丹周顯德末世宗北伐我太祖將兵至瓦橋  
關內斌為關門使開門請降世宗以為汝州刺史  
契丹國志曰瀛莫之失幽州急遽以聞帝曰三關本  
漢地今以還漢何失之有五代史補曰周世宗末

年大舉以取幽州契丹聞其親征君臣恐懼沿邊城壘皆望風而下凡蕃部之在幽州者亦連宵遁去車駕至瓦橋關探邏得實甚喜以為大勲必集因登高阜以觀六師頃之有父老百餘輩持牛酒以獻世宗問曰此地何名對曰歷世相傳謂之病龍臺世宗默然遽上馬馳去是夜聖體不豫即詔回戈未到關而晏駕初幽州聞車駕將至父老竊議曰天子姓柴幽州為燕燕者亦烟火之謂也柴入火不利之兆安得

成功果如其言 鶚案周世宗旋師大梁崩于滋德  
殿陶岳所云亦俗說耳 王存元豐九域志曰獨流  
口在乾寧軍北一百二十里 金人疆宇圖曰涿州  
管下固安縣有獨流村 錢達道霸州志曰益津關  
本唐幽州永清縣地後石晉陷于契丹周復以其地  
置霸州草橋關在城東一里宋遼分界處楊延朗建  
淤口關在城東五十里五代周於此立寨 胡三省  
通鑑注曰瓦橋關在涿州歸義縣九域志在益津關

東八十里宋白曰尾子齊橋在涿州南易州東當九  
河之末王鞏隨手雜錄曰柴世宗銷天下銅像以  
為錢真定像高大不可施工有司請免既而北伐命  
以砲擊之中佛乳竟不能毀未幾世宗癰發乳間而  
殂陳耀文學圃憲蘇曰周世宗毀銅佛像鑄錢曰  
佛教以為頭目髓腦有利於衆生尚無所惜寧復以  
銅像為愛乎鎮州大悲銅像甚有靈應擊毀之際以  
斧鑊自腦鑊破之後世宗北征病疽發腦間或謂報

應出談苑

十年 夏五月壬子漢以潞州歸附遣使來告

契丹國志曰夏五月朔日食

十國春秋曰漢天會四年春正月乙巳周禪位于宋  
宋改元建隆夏四月周昭義節度使李筠起兵拒宋  
遂殺澤州刺史據其城已而遣牙將劉繼冲判官孫  
孚奉表稱臣執其監軍周光遜開廐使李廷玉送漢  
乞兵為援帝欲謀于遼繼冲述筠意請無用契丹兵



帝即率本國兵自將出團柏谷至于太平驛封筠西  
平王筠見帝儀衛不備非如王者心甚悔因自陳受  
郭氏恩不敢愛死帝與周世讐不悅其說遂使宣徽  
使盧贊監其軍事筠心益不平與贊多不協乃留長  
子守節居潞而自引衆南向帝聞贊與筠異遣平章  
事衛融和解之是月遣河陽節度使范守圖將兵援  
筠癸卯宋將石守信敗李筠于長平壬子以潞州歸  
附遣使告遼丁巳宋帝親征筠丁卯宋石守信高懷

德大破筠兵盧贊死焉筠走保澤州宋帝列柵圍之  
六月辛未澤州陷李筠赴火死乙酉宋帝攻潞州丁  
亥李守節以潞州來降

十三年 秋九月

十國春秋曰漢天會七年九月以契丹兵攻平晉軍  
宋雒州防禦使充西山巡檢郭進將兵來擊契丹兵  
遂引歸

冬十二月

李燾續資治通鑑長編曰北漢主嗣位所以事契丹者多畧不如世祖時每事稟之

劉昊廟號世祖

於是契丹遣

使來責云爾先父窮來歸我我先兄天授皇帝待以骨肉洎余繼統益修前好爾父即世我用命爾即位柩前丹青之約我無所負爾父據有汾國七年止稱乾祐爾不遵先志輒肆改更李筠包藏禍心捨大就小無所顧慮姑為覬覦軒然舉兵曾不我告段常本爾父故吏本無大惡一旦誣害誅及妻子婦言是聽

非爾而誰我務敦大義曲容瑕垢父子之道所不忍  
渝爾且率德改行毋自貽伊戚也北漢主得書恐懼  
遣使幣往謝契丹執其使不報北漢地狹產薄又歲  
輸契丹故國用日削乃拜五臺僧繼顥為鴻臚卿繼  
顥故燕王劉守光之孽子守光死削髮為浮圖居五  
臺山為人多智善商財利能誦華嚴經四方供施多  
積蓄以佐國用五臺當契丹界上繼顥常得其馬以獻  
號添都馬歲率數百匹又於栢谷置銀冶北漢主取

其銀以輸契丹歲千斤因即其治建寶興軍清異  
錄曰僧繼顥住五臺山手執香如意紫檀鏤成芬馨  
滿室名為握君十國春秋曰漢天會七年十二月  
帝遣從子侍衛親軍使劉繼文如遼遼拘之不遣

本紀第七

穆宗二

十四年二月壬子詔西面詔討使塔拉進兵援漢

晁公武郡齋讀書志曰晉朝陷蕃記皇朝范質撰石

晉末在翰林為出帝草降表知其事為詳記少主初  
遷于黃龍府後居於建州凡十八年而卒按契丹丙  
午歲入汴順數至甲子歲為十八年寔國朝太祖乾  
德二年也 鶚案晉出帝卒于契丹之歲遼史不載  
惟見此書 彭百川太平治迹統類曰乾德二年昭  
義軍節度使李繼勛攻遼州將杜延韜以城來降契  
丹衆步騎六萬來援繼勛與彰德軍節度使羅彥環洛  
州防禦使郭進內客省使武懷節率馬步軍六萬人

擊其衆於遼州城下敗之契丹又寇平晉軍上遣郭  
進與內客省使曹彬等領步騎萬餘赴之未至而遁  
十五年春二月壬寅朔日有食之

契丹國志曰二月壬寅朔日當食不虧 太平治迹  
統類曰乾德三年冬契丹來寇易州畧居民上令監  
軍李謙昇率兵入其境俘生口如所畧之數俟契丹  
放還易州之民然後歸之

十六年

太平治迹統類曰乾德四年正月契丹又寇易州監軍任德義擊走之天德軍節度使于延超與其子來降上以延超為左千牛衛大將軍六月橫海軍節度使桑興來降

十七年

契丹國志曰春三月五星聚奎夏六月朔日食

十八年秋七月辛丑漢主承鈞殂子繼恩立來告遣使弔祭



續資治通鑑長編曰辛丑漢世祖女為晉護聖營卒  
薛釗妻生子繼恩漢高祖典禁衛以世祖故釋釗軍  
籍館于門下釗無材能高祖衣食之而無所用其妻  
常居中釗罕得見意怏怏因辭拔刀刺之傷而不死  
釗即自裁其妻復改適何氏生子繼元而何與妻俱  
卒世祖以孝和帝無子使養繼恩及繼元俱冒姓劉  
氏繼恩事孝和帝盡禮及為太原尹選輓不治孝和  
帝憂之謂宰相郭無為曰繼恩純孝然非濟世才

恐不能了我家事無為不對孝和殂繼恩遣使告終  
稱嗣于契丹契丹許之然後即位繼恩怨郭無為與  
其父言不助已且惡其專政欲逐之未果服線裳視  
事寢處皆居勤政閣其左右親信悉留太原府繼恩  
置酒晏大臣及宗子飲罷臥閣中供奉官侯霸榮率  
十餘人挺刃入閣反扃其戶繼恩驚起繞書堂屏風  
環走霸榮以刃撻其胸殺之無為遣兵以梯登屋入  
殺霸榮并其黨迎立太原尹繼元繼恩立纔六十

日或謂無為使霸榮作亂亟誅霸榮以滅口故人無  
知者

十九年春三月甲寅漢劉繼元嗣立遣使求封冊辛酉  
遣韓知範冊為皇帝

十國春秋曰漢天會十三年春二月宋帝將發自卞  
先遣李勲趙質郭進司超等帥兵赴晉陽三月帝至  
于太原及城下李繼勲已先敗漢兵宋帝命築長連  
城圍之立砦于城四面繼勲軍于南趙贊軍于西曹

彬軍于北党進軍于東帝命劉繼業等乘晦突圍犯東西砦戰敗遁歸宋帝又命壅汾晉二水以灌城并人大恐會城中有積草漂出塞之得無害甲寅遣使乞封冊于遼且趣援師夏四月契丹分道入援宋何繼筠逆戰于陽曲北韓重贇逆戰于定州契丹大敗閏五月遼主遣韓知璠冊立帝為大漢皇帝知璠習兵事居圍城中晝夜督察盡心固守宋驍將石漢卿等多戰死漢兵亦屢敗宋師頓兵甘草地中會暑雨

軍士多疾遂引兵還帝命決城下水注之臺駘澤已  
涸而城多摧圯韓知璠嘆曰宋師之引水灌城也知  
其一不知其二若先浸而後涸則并人無噍類矣

己巳如懷州獵獲熊歡飲方醉馳還行宮是夜近侍霄  
格盥水華格庖人錫衮等六人反帝遇弒

五代史曰舒嚕有疾不能近婦人左右給事多以宦  
者 楊循吉遼史曰穆宗嗜酒好殺不恤政事京師  
置百尺牢以處罪囚 契丹國志曰是時承會同之

餘威中原多事藩鎮爭強莫不求援于遼國以自存  
晉陽之北漢江南之南唐使車狎至饋遺絡繹遼帝  
以政昏兵弱不能應之帝體氣卑弱惡見婦人居藩  
時舒嚕太后欲為納妃帝辭以疾即位後嬪御滿前  
並不以顧朝臣有言椒房虛位者皆拒而不納左右  
近侍房帷供奉率皆閹人帝不以屑意上京東北有  
山曰黑山曰赤山曰太保山山水秀絕麋鹿成羣四  
時遊獵不離此山逮至末年殘忍猜忌左右小有過

愆至于親手刃之數年之間重足屏息人人無不虞  
禍會飲酒索食諸物不得欲斬庖人掌膳者恐禍及  
已捧食以進挾刃弑帝于黑山下在位凡十九年諡  
曰天順皇帝廟號穆宗



遼史拾遺卷五

欽定四庫全書

史部

遼史拾遺卷六

七

詳校官庶吉士臣瑚圖禮

總校官庶吉士臣何思鈞

校對官學正臣湯垣

謄錄監生臣蔡枝華



欽定四庫全書

遼史拾遺卷六

錢塘厲鶚撰

本紀第八

景宗

景宗孝成康靖皇帝諱賢字賢寧小字明辰

契丹國志曰景宗諱明計火神淀弒逆之時舍音害  
世宗并及于后復求帝殺之帝時九歲御厨尚食劉

嘉哩以毳束之藏于積薪中由是得免及即位嬰風疾多不視朝

保寧元年 夏五月壬寅漢遣李匡弼劉繼文李元素等來賀

十國春秋曰北漢天會十三年五月遣李匡弼李元素等如遼賀天清節按遼史有劉繼文然繼文尚留契丹今不從 太平治迹統類曰開寶二年太祖親征河東契丹兩道率衆來援一道攻石嶺關為何繼

筠所破一道攻定州為韓重贇擊敗之是秋涿州刺史許周瓊來降上以周瓊為涿州刺史於是豐州刺史王仲晏上言契丹日利月利等一十六族歸款上以其大酋領羅莽四人為懷化將軍魯斯八人為懷化郎將餘八十五人為歸德司戈

二年春正月

十國春秋曰天會十四年春正月契丹歸漢使臣十人韓知璫歸國言漢庶事多梗而無輔臣政事令

趙高勲亦言晉陽為父子國盡拘其使無謂也遂有是命

冬十一月

陳均九朝編年備要曰開寶三年冬十一月契丹六萬騎寇定州命田欽祚領兵禦之戰蒲城敵騎小却乘勝至遂城敵圍之數日欽祚度城中糧少整兵開南門突圍一角出是夕至保塞軍中不亡一矢北邊傳言三千打六萬

六年 春三月宋遣使請和遼以涿州刺史耶律昌為  
侍中與宋議和

孫逢吉職官分紀曰契丹于開寶七年涿州刺史  
耶律琮以書遺雄州孫全興願講好于朝廷八年  
遣款附使克實克舒蘇奉書來聘自是乃通使  
矣 太平治迹統類曰開寶七年耶律琮以書  
遺知雄州孫全興曰琮受君命交于境外言則  
非宜事有利於國家專之亦可南北兩地古今所同

曷嘗不世載歡盟時通贄幣往者晉氏後主政出  
多門惑彼強臣忘我大義干戈以之日用生靈于是  
罹災今茲兩朝本無纖隙若或交馳一介之使顯布  
二君之心用息疲民重修舊好長為與國不亦休  
哉琮以甚微敢干斯義遠希通晤洞垂鑒詳太祖  
命全興以書答焉

七年春三月

太平治迹統類曰開寶八年閏三月契丹遣款附使

克寶克舒蘇奉書來聘稱契丹國上命閣門副使郝  
崇信至境上迓之及至館于都亭驛太祖召見賜以  
襲衣金帶銷金烏羅帽烏皮靴器幣二百銀勒鞍馬  
其僕從衣服器幣有差宴于內殿仍召至便殿觀諸  
班騎射令其一使者與衛士馳射毛毬截柳枝及歸  
國召見賜器幣衣服 十國春秋曰北漢廣運二年  
春三月遼與宋求成遣使來告命漢通好于宋無妄  
興師 潘自牧記纂淵海曰開寶七年契丹願講好

使命始通我朝遣郝崇信呂端為使此報聘也復遣  
宋準郝文度為契丹國信使

夏六月

十國春秋曰夏六月遼主冊漢帝為大漢英武皇帝  
賜御衣玉帶鞍馬等物

八年 夏六月 秋七月

契丹國志曰夏六月彗出柳長三四丈晨見東方西南指  
厯與鬼距室壁凡十一舍八十三日乃滅秋七月朔日食



本紀第九

景宗二

九年 夏四月

契丹國志曰夏四月宋葬太祖于永昌陵遼遣鴻臚少卿耶律敞等往宋助葬宋太宗尋遣起居舍人辛仲甫使遼右贊善大夫穆波副之時宋將用兵伐北漢北漢冥倚遼為援仲甫遲留境上未敢進宋朝詔趣行既至帝問曰聞中國有黨進者真驍將如進之

比幾人仲甫對曰名將甚多如進鷹犬之材何可勝數帝頗欲留之仲甫曰信以成命義不可留有死而已帝知其秉節不可奪厚禮遣還

十年

查嗣璉人海記曰歸義寺朔于遼內有石幢記作駢語末書會同九祀龍集敦牂元月二十一日謹記又記云大遼保寧十年都亭嗣侯太原王公為皇妣自會同九年捨資就奉福寺文殊殿前又建法幢于灝

村之墳京東之墓云云建幢女弟子張氏長男攝祁  
州司馬慈次男留守押衙前都亭驛使次男攝寰  
州長史恕長女成郎婦次女李郎婦次女陳郎婦未  
嫁女吉年孫男三年銀青崇祿大夫檢校工部尚書  
兼御史大夫上柱國鄭承嗣表弟閤門使崇祿大夫  
檢校兵部尚書兼御史大夫上柱國郭陟次表弟將  
仕郎前守昌平縣主簿郭升鵠字者尹奉威也

乾亨元年春三月丁酉耶律沙等與宋戰于白馬嶺

不利翼王迪里及圖魯卜部節度使圖敏黃皮室詳袞  
唐古皆死之

十國春秋曰三月丁酉耶律沙等與宋將郭進遇于  
白馬嶺時契丹兵阻大澗沙與諸將欲待後軍至而  
戰翼王迪里監軍扎實等以為急擊之便沙不能奪  
迪里等以先鋒渡澗未半為宋人所擊兵潰迪里及  
其子幹實瑄之子迪里圖魯卜部節度使圖敏黃皮  
室詳袞唐古等五將俱沒士卒死傷甚衆會南院大

王色珍兵至萬矢齊發敵軍始退

夏五月己卯宋兵至河東漢與戰不利劉繼文盧俊來  
同奔六月劉繼元降宋漢亡

王應麟玉海曰太平興國四年正月庚寅命宣徽南  
院使潘美等進師二月二日詔親征二十九日次德  
清軍三月庚辰朔次真定四月壬戌克奇嵐乙丑克  
隆州己巳克嵐州繼元外援不至饒道絕王師四合  
唐子上次太原駐蹕汾水東二十三日幸城四面按

行營壘閱視攻具翌日夜漏未盡幸城西督諸軍發  
機石攻城二十七日命馬仁瑀慕容福超白重貴李  
繼昇等分道攻城帝自草詔賜繼元五月壬戌幸城  
南上曰翌日上午當食于城中癸未諸將急攻城欲  
壞帝恐屠城麾衆少退是夜繼元納款甲申幸城北  
張樂宴從臣于城臺受降續資治通鑑長編曰太平  
興國四年五月壬午上幸太原城南謂諸將曰翌日  
重午當食于城中遂自草詔賜北漢主夜漏下一刻

城上有蒼白雲如人牀癸未幸城南督諸將急攻士  
奮怒爭乘城不可遏上恐屠其城因麾衆少退城中  
人猶欲固守左僕射馬峯以病卧家舁入見北漢主  
流涕以興亡諭之遂納款繼元妻峯女也夜漏下十  
刻北漢主遣客省使李勲上表納款上喜即命通事  
舍人薛文寶齎詔入城撫諭夜漏未盡幸城北宴從  
臣于城臺受其降 十國春秋曰劉繼文世祖嫡孫  
也為人魁梧有氣局沉毅寡言厯官侍御親軍使天

會時契丹來問罪輒拘係行人數輩睿宗乃命繼文  
往賀因請命亦被留不發未幾遼主怒解盡歸使者  
十六人厚禮以遣而繼文與焉時英武帝嗣位三年  
也遼主仍移書令以繼文同平章事繼文歸秉國政  
左右害其寵多譖毀之已而出為代州刺史國亡復  
奔契丹封彭城郡王終于其國 九朝編年備要曰  
自劉旻僭號歷四主凡二十九年至是年亡 東都事  
畧曰繼元之未敗也太宗先命郭進斷契丹之援于



石嶺關進至契丹果來援進擊走之繼元猶以蠟彈  
帛書求救于契丹進得之以徇城下及降太宗宥其  
罪授右衛上將軍封彭城郡公賜第京師

宋主來侵丁卯北院大王實達爾統軍使蕭朶果伊實  
薩哈擊之戰于沙河失利己巳宋主圍南京丁丑詔諭  
耶律沙及實達爾朶果等軍中事宜秋七月癸未沙等及  
宋兵戰于高梁河少却休格色珍橫擊大敗之宋主僅  
以身免至涿州竊乘驢車遁去

玉海曰太平興國四年既下并州上欲乘勝取范陽  
殿前都虞候崔翰曰乘破竹之勢時不可失六月甲  
寅發京東河北軍儲赴北面行營庚申上北征丁卯  
上躬率兵攻東易州遼刺史劉宁以州降留兵千人  
守之戊辰涿州降以萬人戍守庚午駐蹕幽州城南  
契丹不敢居城中有萬餘衆屯城北上率兵乘之斬  
千餘級餘黨遁壬申命諸將攻城旬有五日以士卒  
疲且食盡七月甲申班師 九朝編年備要曰太平

興國四年詔征契丹六月發鎮州易州涿州未降上  
至幽州敗契丹于城北秋七月上至自幽州東都  
事畧曰曹翰從征幽州所部攻城之東南隅卒掘土  
得蟹以獻翰謂諸將曰蟹水物而陸居失所也且多  
足敵救將至不可進拔之象其班師乎已而果然

王鞏聞見近錄曰太宗皇帝自并州乘勝直趨幽燕  
有錫里郎君裕悅者請得五千騎以嘗王師不成退  
處未晚從之乃騎持一幟由間道邀我歸路周環往

來晝夜不絕帝疑救兵大至宵歸定州王師多沒至  
今號其奇兵曰裕悅軍契丹國志曰秋七月宋太

宗至幽州攻城踰旬不下士卒疲頓轉輸回遠遂退

師先是宋師自并幸幽乘其無備帝方獵急歸牙帳

議棄幽薊以兵守松亭北岸口而已時耶律遜寧號

裕悅呼為錫里郎君

北朝親近無職事者呼之

請兵十萬至幽州

並西山薄幽陵入夜持兩炬朝舉兩旗選精騎三萬  
從他道自宋軍南席卷而北遼兵先守幽州者皆脆

弱見宋師之盛望風而遁又為宋師所遏進退無計  
反為堅守至是裕悅救至宋遂退師 王銍默記曰  
神宗與滕元發語及遼事曰太宗自燕京城下軍潰  
敵追之僅得脫凡行在服御寶器盡為所奪從行宮  
嬪盡陷沒股上中兩箭歲歲必發竟以前創之故棄  
天下

九月己卯燕王韓匡嗣為都統南府宰相耶律沙為監  
軍特哩袞休格南院大王色珍權奚王穆濟等各率所部

兵南伐仍命大同軍節度使善補領山西兵分道以進

九朝編年備要曰太平興國四年九月契丹寇鎮州趙延進等敗之初上以陣圖賜諸將俾分為八陣至是敵騎至延進亟登高望之東西亘野不見其尾崔翰等方按圖布陣相去百步延進會翰等曰今敵騎若此而我師星布其勢懸絕若合而擊之可以決勝李繼隆亦曰兵貴通變安可預料于是分為二陣

前後相副大破之捷書聞手詔嘉獎

四年秋九月庚子幸雲州甲辰獵于祥古山帝不豫壬子次焦山崩于行在年三十五

宣府鎮志曰乾亨四年契丹以山後諸州給兵民力凋敝田穀多躡于兵乃詔復今年租又勅諸州有逃戶莊田許蕃漢人承佃供給租稅五週年内歸業者三分交還二分十週年内還一半十五週年内三分還一分詐認者罪之契丹國志曰帝性仁懦雅好

音律喜醫術針灸之輩授以節鉞使相者三十餘人  
自幼疾沉痾連年四時遊獵間循故典體憊不能跨  
馬令節大朝會鬱鬱無歡或不視朝者有之耽于酒  
色早暮不少休燕燕皇后以女主臨朝國事一決于  
其手大誅罰大征討番漢諸臣甚衆共議皇后裁決  
報知于帝而已易定幽薊間兩大戰烽火軍書旁午  
國內惶惶帝嬰疾不能親駕基業哀焉

遼史拾遺卷六



欽定四庫全書

遼史拾遺卷七

錢塘厲鶚撰

本紀第十

聖宗

聖宗文武大孝宣皇帝諱隆緒小字文殊努

統和元年春正月

契丹國志曰統和元年帝即位復號大契丹

二月戊子朔

契丹國志曰二月朔日食

本紀第十一

聖宗二

四年二月癸卯西夏李繼遷叛宋來降

續資治通鑑長編曰初李繼捧入朝其弟夏州蕃落使繼遷留居銀州及詔發繼捧親屬赴闕獨繼遷不樂內徙時年十七勇悍有智謀偽稱乳母死出葬郊

外以兵甲寘棺中與其黨奔入蕃族地斤澤距夏州東北三百里出其祖彛興畫像以示戎人戎人皆拜泣繼遷自言我李氏子孫當復興宗緒族帳稍稍歸附嘗遣所部奉表詣麟州貢馬及索駝等勅書詔諭之繼遷不出知夏州尹憲偵知繼遷所在與巡檢使曹光寶選精騎夜發兵掩襲地斤再宿而至斬首五百級燒四百餘帳獲繼遷母妻及羊馬器械萬計繼遷僅以身免

三月庚辰寰州刺史趙彥章以城叛附于宋牟已宋兵

入涿州義順軍節度副使趙希贊以朔州叛附于宋  
續資治通鑑長編曰雍熙三年三月潘美出雁門自  
西陘入與契丹戰勝之逐北至寰州庚辰刺史與彥  
章舉寰州降詔以彥章為本州團練使曹彬進壁于  
涿州東復與契丹戰李繼隆范廷召等皆中流矢督  
戰愈急契丹遂敗乘勝攻其北門克之辛巳取涿州  
潘美進圍朔州其知州節度副使趙希贊舉城降詔  
以希贊為本州觀察使

癸未遼軍與宋田重進戰于飛狐不利冀州防禦使大鵬翼康州刺史馬軍指揮使何萬通陷焉

續資治通鑑長編曰田重進至飛狐契丹西南面招討使大鵬翼帥衆來援行營西上閣門使袁繼忠謂重進曰敵多騎兵利于平地不如乘險逆擊之蘄州刺史胡城譚延美曰敵恃衆易我若出其不意可克也於是重進陣壓東偏數交鋒勝負未決日將夕命荆嗣出西偏薄山崖以短兵接戰敵投崖而下手斬

首數百級敵勢劒散卒千餘在野嗣呵止降之敵人  
退屯土嶺裨將黃明與戰不利嗣謂明日汝第頓兵  
于此為我聲援我當奪此嶺遂力戰克之追奔五十  
餘里抵倉頭而還拔小治直谷二寨嗣因留屯直谷  
居數日契丹遣騎挑戰勢頗張重進召嗣合兵擊却  
之契丹乘夜復圍直谷石門二寨重進遣嗣往救嗣  
曰今所部才五百人敵衆二百餘力不敵矣重進憂  
之問嗣計將安出嗣曰譚延美方屯小治有兵二千

願問道往邀其策應遂馳見延美延美曰敵勢如此  
何可當也嗣曰但願以全軍就平川列隊樹旗別遣  
三二百人執幟於道側嗣乃以所部五百人疾驅往  
聞彼見幟綿亘遠甚疑大軍繼至敵雖衆可破也延  
美許焉癸未嗣還力戰一日五七合敵不勝將遁重  
進遂以大軍乘之敵騎崩潰生擒大鵬翼及監軍馬  
頤副將何萬通并契丹渤海千餘人 太平治迹統  
類曰丁亥潘美轉攻應州其節度使艾正觀察判官

宋雄舉城降即授正本州觀察使雄為鴻臚少卿同知應州雄幽州人也田重進進圍飛狐令大鵬翼至城下諭其守將定武軍馬步軍都揮使郢州防禦使呂行德尚欲堅守重進急攻之卒知行德乃與其副都指揮使張繼從馬軍都指揮使劉知進等舉城降詔升其縣為飛狐軍以行德為左驍衛將軍順州防禦使繼從為右屯衛將軍檀州刺史知進為左監門衛將軍重進又圍靈州丙申其守將步軍都指揮使



穆超舉城降以超為右監門衛將軍夏四月辛丑潘  
美克雲州斬首千級田重進破其援軍於飛狐北斬  
首千級俘四百人壬寅朱信破敵於新城斬首三百  
級乙卯田重進至蔚州趙彥欽等殺其將蕭卓琳及  
其守卒千人節度使耶律紹忠舉城降初王師入契  
丹境所向皆下卓琳紹忠等懼不自安欲殺城中將  
吏盡率其豪傑北歸存璋等知其謀乃先事而發紹  
忠父美為契丹奉聖節度弟雍為三司使領同州州

金史卷之七  
在西樓南數百里方從契丹主至遙樂河聞王師至  
遣為蔚州監城使于是被執存璋等初請降重進殺  
之先命荆嗣率猛士數千人繼而入得實乃納其款  
五月庚午遼師與曹彬來信戰于歧溝關大破之

九朝編年備要曰雍熙三年春正月命曹彬等分道  
伐契丹夏五月詔班師彬等之行也上諭潘美之師  
但先趨雲中卿等以十萬之衆聲言取幽州持重緩  
行毋貪小利敵聞大兵至必悉衆救范陽不暇援山

後矣彬至涿州留十餘日食盡退師雄州以援供饋  
上聞之大駭曰豈有敵人在前而却軍以援粟乎亟  
遣使止之彬所部聞羨及重進累捷恥不能有所攻  
取乃再趨涿州復以糧食不繼退師至岐溝關契丹  
追及之我師大敗

七月丙子樞密使色珍遣侍御訥呼岱噶楚噶奏復朔  
州擒宋將楊繼業

九朝編年備考曰太平興國四年劉繼元降北漢平

上遣中使召劉繼業得之大喜命為防禦使繼業初  
為繼元扞太原城東南頗殺傷王師及繼元降繼業猶據城  
苦戰上素知其勇敢生致之諭繼元俾招之繼元遣  
所親信往繼業乃北面再拜大慟釋甲來見上喜撫  
慰之甚厚復姓楊氏名業業初姓楊氏名重貴幼事  
北漢更賜以姓名上尋命業知代州業在邊契丹畏  
之每望業旗即引去續資治通鑑長編曰雍熙三  
年八月初徙雲朔襄應四州民詔潘美楊業等以所

部兵護送之時契丹國母蕭氏與其大臣耶律漢寧  
南北皮室及烏克紳特哩袞領衆十餘萬復陷寰州業謂  
美等曰今寇鋒銳盛不可與戰朝廷止令取數州之  
民但領兵出大石路先遣人密告雲朔守將俟大軍  
離戍日令雲州之衆先出我師次應州契丹必悉兵  
來拒即令朔州吏民出城直入石碣各遣强弩三千  
列于谷口以騎士援於中路則三州之衆保萬全矣  
監軍西上閤門使蔚州刺史王侁沮其議曰君素號

無敵今見敵逗撓不戰得非有他志乎業曰業非避死蓋時有未利今君責業以不死當為諸公先死耳乃引兵自石跌路趨朔州將行泣謂美曰此行必不利業太原降將分當死上不殺寵以連帥授之兵柄非縱敵不擊蓋伺其便將立尺寸功以報國恩今諸君責以避敵業當先死于敵因指陳家谷口曰諸君於此張步兵強弩為左右翼以援俟業轉戰至此步兵夾擊之不然者無遺類矣美即與僉以麾下兵陳

于谷口自寅至巳僉使人登托邏臺望之以為敵敗  
走僉欲爭其功即領兵離谷口美不能制乃緣灰河  
西南行二十里俄間業敗即麾兵却走業力戰自日  
中至暮果至谷口望見無人即拊膺大慟再率帳下  
士力戰身被數十創猶手刃數十百人馬重傷不能  
進遂為敵所擒不食三日死其子延玉與岳州刺史  
王貴俱死焉

十二月甲辰詔南大王與休格合勢進討上率大軍與

宋將劉廷讓李敬源戰于莫州敗之乙巳擒宋將賀令  
圖楊重進等

續資治通鑑長編曰雍熙三年十二月契丹將耶律  
遜寧號裕悅者以數萬騎入寇瀛州都部署劉廷讓  
與戰于君子館會天大寒我師不能發弓弩契丹圍  
廷讓數重廷讓先以麾下精卒與滄州都部署李繼  
隆令後殿緩急期相救及廷讓被圍繼隆退屯樂壽  
御前忠佐神勇指揮使桑贊以所部兵力戰自辰至



申而契丹援兵復至贊引衆先遁廷讓全軍皆沒死者數萬人廷讓得麾下他馬乘之僅脫死先鋒將六宅使平州團練使知雄州賀令圖武州團練使高陽關部署楊重進俱陷于契丹令圖性貪功生事復輕而無謀裕悅素知令圖嘗使給之曰我獲罪于契丹願歸朝無路自拔幸君少留意焉令圖不虞其詐自以為終獲大功私遺裕悅重錦十兩至是裕悅傳言軍中願得見雄州賀使君令圖先為所給意其來降

即令麾下數十騎逆之將至其帳數步外裕悅據胡  
牀罵曰汝嘗好經度邊事今乃送死來耶麾下左右盡  
殺其從騎反縛令圖而去重進力戰死之初令圖與  
父懷浦首謀北伐一歲中父子俱敗天下笑之 九  
朝編年備要曰雍熙三年十二月契丹寇代州兵薄  
城下神衛都校馬正率所部禦之衆寡不敵副部署  
盧漢贊畏懦保壁自守守臣張齊賢選廂軍二千出  
正之左右誓衆感慨一以當百敵少却是齊賢約

潘美以并師來會間使為敵所得既而美師至謂有旨令  
無出師齊賢乃閉其使室中夜遣兵由城西南持幟然  
炬敵見謂并師至駭而北走齊賢先伏兵掩擊大敗之  
本紀第十二

聖宗三

五年春正月

九朝編年備要曰雍熙四年春正月契丹入寇陷深  
祁德易等州 太平治迹統類曰雍熙四年春正月

初李彬及劉延讓等相繼敗覆軍亡死者前後數萬人緣邊瘡痍之卒不滿萬計皆無復鬪志河朔震恐悉料鄉民為兵以守城皆白徒未嘗習戰陣但堅壁自固不敢禦敵敵勢滋振長驅入深祁陽易州殺官吏掠士民所過郡邑攻不能下者則俘村墅子女縱火大掠輦金帛而去

三月癸亥朔幸長春宮賞花釣魚

孫承澤北平古今記曰遼有二長春宮一在南京一

在長春州若統和五年三月朔幸長春宮賞花釣魚  
十二年三月如長春宮觀牡丹十七年正月朔如長  
春宮則非南京之長春宮也

七年秋七月癸巳遣兵南征

契丹國志曰秋七月彗出東井凡八十日契丹攻威  
勝軍為宋尹繼倫李繼隆敗于唐徐河間殺契丹相  
皮室其大將裕悅被傷遁走俘獲甚衆自是契丹不  
復大入契丹之人以繼倫面黑相戒曰當迴避黑面

大王 續資治通鑑長編曰端拱二年秋七月威勝  
軍糧餽不繼契丹欲規取詔定州路都部署李繼隆  
發鎮定大軍護送輜重凡數十乘契丹將裕悅諜知  
之率精銳數萬騎來逆崇儀使北面緣邊都巡檢尹  
繼倫屬令步騎千餘人按行塞上正當敵所入道敵  
不擊而過徑襲大軍繼倫因令軍中秣馬會夜遣人  
持短兵擊發躡敵後行數十里至唐河徐河之間天  
未明敵去大軍四五里繼隆列陣于南北以待之敵

方會食繼倫出其不意急擊之殺敵將一人號皮室  
裕悅食未竟棄匕箸為短兵中其臂創甚乘善馬先  
遁敵望見大軍遂崩潰自相蹂踐死者無數繼隆與  
鎮州副都部署范廷召追奔過徐河十餘里俘獲甚  
衆定州副都部署孔守正又與敵戰漕河之斜村梟  
其帥大盈相公等三十餘級敵自是不敢大入寇相  
戒曰當避黑面大王

九月

契丹國志曰九月鎮星熒惑入南斗

本紀第十三

聖宗四

八年

王濬初恒岳志曰宋太宗淳化元年契丹欲入寇使  
詣北岳廟卜神不許契丹使怒縱火焚廟而去遂不入寇  
九年冬十二月

契丹國志曰統和九年冬十二月女真以契丹兵隔



其貢宋之路請宋攻之不許自是遂屬契丹

十一年 春三月高麗王治遣朴良柔奉表請罪取女  
真鴨淶江東數百里地賜之

契丹國志曰春三月朔日食 東國通鑑曰高麗成

宗文懿王十二年冬十月契丹遣蕭遜寧將兵侵我

西鄙王遣徐熙講和遜寧兵退先是西北界女真報

契丹謀舉兵來侵朝議謂其紿我不以為備至是復

報兵至始知事急分遣諸道軍馬齊整以侍中朴良

柔為上軍使內史侍郎徐熙為中軍使門下侍郎崔亮為下軍使軍于北界以禦契丹閏月幸西京進次安北府聞契丹蕭遜寧將兵攻蓬山郡獲我先鋒軍使尹庶顏等王不得進乃還熙引兵欲救蓬山遜寧聲言大朝既已奄有高句麗舊地今爾國侵奪疆界是用致討又移書云大朝統一四方其未歸附期于埽蕩速致降款毋涉淹留熙見書有可和之狀王遣監察司憲偕禮賓少卿李蒙戡如契丹營請和遜寧

曰汝國不恤民事是用恭行天罰若欲求和宜速來  
降蒙戡還王會羣臣議久無回報遂攻安戎鎮中郎  
將大道秀郎將庾方與戰克之遜寧不敢復進遣人  
促降王遣通和使閤門舍人張瑩往契丹營遜寧曰  
宜更以大臣送軍前面對瑩還徐熙請往奉國書如  
契丹營使驛者問相見禮遜寧曰我大朝貴人宜拜  
于庭熙曰臣之于君拜下禮也兩國大臣相見何得  
如是往復再三遜寧不許熙怒還卧所館不起遜寧

乃許升堂行禮遜寧語熙曰汝國與新羅地高句麗之地  
我所有也而汝侵蝕之又與我連壤而越海事宋大  
國是以來討今割地以獻而修朝聘可無事矣熙曰  
非也我國即高句麗之舊也故號高麗都平壤若論  
地界上國之東京皆在我境何得謂之侵蝕乎且鴨  
綠江內外亦我境內今女真居其間道途梗澀甚於  
涉海朝聘之不通女真之故也若令逐女真還我舊  
地築城堡通道路則敢不修聘辭氣慷慨遜寧知不

可強遂具以聞契丹帝曰高麗既請和宜罷兵熙留  
契丹營七日而還王大喜即遣良柔為禮幣使入覲  
熙復奏曰臣與遜寧約盪平女真收復舊地然後朝  
覲可通今纔收江內請俟得江外修聘未晚王曰久  
不修聘恐有後患遂遣之東國史畧曰高麗成宗  
文懿王十二年契丹遣蕭遜寧侵西京攻蓬山郡至  
安戎鎮王幸西京次安北府不得進中軍使內史侍  
郎徐熙請行奉國書如契丹營熙辭氣慷慨遜寧知

不可強遂具聞契丹帝許和勅罷兵史臣曰方遜寧  
之入寇也大振聲勢恐喝脅降羣臣獻議或乞降或  
割地徐熙獨力陳不可欲與一戰即寇準親征之策  
也及使契丹抗禮不屈終講和親其奉使得體又豈  
下于富弼乎 東國事畧曰成宗文懿王十二年始行  
契丹年號

秋八月

契丹國志曰秋八月朔日食

十二年春三月丁巳高麗遣使請所俘人畜詔贖還丙寅遣使諭高麗

東國通鑑曰高麗成宗文懿王十三年春二月蕭遜寧致書曰近奉宣命但以彼國信好早通境土相接雖以小事大固有規儀而原始要終須存悠久若不設於預備慮中阻于使人遂與彼國商議使於要衝路陌創築城池者尋准宣命自便斟酌擬於鴨江西創築五城取三月初擬到築城處下手修築伏請大

王預先指揮從安北府至鴨江東計二百八十里踏  
行穩便田地酌量地里遠近并令發遣築城夫役同  
時下手其合築城數早與回報所貴交通車馬長開  
貢觀之遙永奉朝廷自叶安康之計始行契丹年號  
三月遣侍中朴良柔奉表如契丹告行正朔乞還俘  
口六月遣元郁如宋乞師以報契丹宋以北鄙甫寧  
不宜輕動優禮遣還自是與宋絕契丹遣榮祿大卿  
蕭述管御史大夫李沅賫詔來撫諭 鄭麟趾高麗



史曰成宗十三年始行契丹統和年號契丹遣榮祿卿蕭述管御史大夫李浣等賫詔來撫諭遣使契丹進妓樂止之

十三年春正月

續資治通鑑長編曰至道元年正月契丹大將韓德威率萬騎誘党項勒浪寅族十六府大首領瑪爾威等自振武入寇永安節度使折御卿率輕騎邀擊之大敗其衆於子河汭勒浪之族乘亂詐為府州兵躡其

後敵大驚擾死者十六七委其輜重涉河而遁契丹將號突厥太尉司徒錫里死者二十餘人生擒吐渾首領一人德威僅以身免高麗史曰成宗十四年春二月遣李周禎如契丹獻方物又進鷹遣李知白如契丹獻方物遣童子十人於契丹習其語遣左丞趙之遴如契丹請婚以東京留守駙馬蕭恒德女許嫁

夏四月

契丹國志曰契丹攻雄州為守臣何承矩所敗

秋八月壬辰詔修山澤祠宇先哲廟貌以時祀之

宣府鎮志曰契丹統和十三年帝在炭山詔歸化等處守臣修山澤祠宇先哲廟貌以時祀之於是諸州孔子廟及奉聖黃帝祠儒州舜祠大翻山王次仲祠俱為一新

十四年春三月壬寅高麗國王治表乞為婚許以東京留守駙馬蕭恒德女嫁之

高麗史曰成宗十五年春三月契丹遣翰林學士張  
幹忠正軍節度使蕭淑格來冊王曰漢重呼韓位列  
侯王之上周尊熊繹世開土宇之封朕法古為君推  
恩及遠惟東溟之外域順北極以來王歲月屢遷梯  
航靡倦宜舉真封之禮用旌內附之誠爰採彞章敬  
敷寵數咨爾高麗國王王治地臨鯁壑勢壓蕃隅繼  
先人之茂勲理君子之舊國文而有禮智以識機能  
全事大之儀盡協酌中之體鴨江西限曾無恃險之

心鳳宸北瞻克備以時之貢言念忠敬宜示封崇升  
一品之貴階正獨坐之榮秩仍疏王爵益表國恩冊  
爾為開府儀同三司尚書令高麗國王於戲海岱之  
表汝惟獨尊辰下之區汝惟全有守茲富貴戒彼滿  
盈無庸小人之謀勿替大君之命敬修乃事用合朝  
經俾爾國人同躋壽域永揚休命可不美哉幹等至  
西郊築壇傳冊王備禮受冊大赦遣韓彥卿如契丹  
納幣

夏四月己亥鑿大安山取劉守光所藏錢

太平御覽引後唐書曰劉仁恭在幽州以堙土為錢  
令部人行使聚銅錢于山上鑿穴藏之為無窮之計  
冊府元龜曰後唐劉仁恭為幽州節度使物力雄  
富志氣驕縱師道士王若訥修長生之法乃于州西  
大安山營造臺觀極其雕麗聚美婦人為黃帝房中  
之法又慮四鄰侵寇幽州城陷且曰吾居此山四面  
絕壁以百士守門萬夫不能進乃圖無窮之計號令

九州禁使銅錢自以膠和瑾土為泥錢令九州行使其銅錢峻法賦歛鑿大安山為石穴以藏之其數百萬每藏畢即殺匠氏以滅口自仁恭父子敗後往往有上言者知錢處所竟無所得又曰長興元年勅旨劉仁恭頃為燕帥不守藩條輒造泥錢號為山庫殊非濟物一向害人醜狀尋除惡名猶在鴉案大安山藏錢唐書太平御覽俱作劉仁恭事遼史作守光誤

十五年冬十一月高麗王治薨姪誦遣王同穎來告

東國通鑑曰冬十月戊午王疾大漸召佐開寧君誦  
傳位移御內天王寺薨是日誦即位十一月遣閤門  
使王同穎如契丹告嗣位十二月契丹遣千牛衛大  
將軍耶律廸里來賀千秋節王迎命告于成宗棹宮  
前

本紀第十四

聖宗五



十六年春二月

契丹國志曰春二月彗出營室北

夏四月

東國通鑑曰穆宗宣讓王元年夏四月契丹以前王  
薨逝勅還納幣之物

五月

契丹國志曰夏五月朔日食

冬十月

契丹國志曰冬十月朔日食

十七年秋九月

契丹國志曰秋九月朔日食

冬十月癸酉攻遂城不克

曾鞏隆平集曰咸平二年契丹入寇楊延昭在遂城  
城小無備衆心危懼延昭集城中丁壯護守偶大寒  
命汲水注城外及旦冰堅滑城不可近敵遂解去

東國通鑑曰穆宗宣讓王二年冬十月契丹遣右常

侍劉績加冊王為尚書令

十九年冬十月己亥南伐丙寅次滿城以泥淖班師

續資治通鑑長編曰咸平四年冬十月甲寅北面前

陣鈐轄張斌與契丹遇于長城口時積雨契丹弓用

皮弦皆緩濕斌擊敗之殺獲甚衆九朝編年備要

曰咸平四年冬十月契丹入寇張斌敗之於長城口

李繼宣尋又敗之於山谷初七月以契丹謀入寇命

王顯為鎮定三路都部署是冬顯奏大破契丹殺二

萬餘人餘衆遁去 太平治迹統類曰咸平四年十

一月王顯與契丹戰大破之戮二萬人獲其國大王

統軍成林相公等十五人首級并甲馬甚衆餘皆奔

北號慟滿野 僧文瑩玉壺清話曰王顯少為太宗

給事赤脚道者相曰此兒須為將相但無陰德耳咸

平中出師定州便宜從事忽道士通謁自稱鄴都觀

主笑則口角至耳亂髮若剛鬚謂曰昨日上帝牒審

魂二萬至本觀死于公手公果殺之則功冠於世然

減算十年二端請裁之顯謂風狂叱起後數日契丹引數萬騎獵于威勝軍境顯引兵襲擊大破之斬二萬級露布至闕召為樞相數稔而卒

二十一年夏四月耶律努格蕭達蘭獲宋將王繼忠于望都

九朝編年備要曰咸平六年夏四月王繼忠戰沒繼忠時為副都部署與都部署王超逆戰于望都之南遂陷于契丹上以其實戰死贈繼忠官錄用其子

冬十一月

契丹國志曰冬十一月有星孛于井鬼

二十二年秋閏月己未南伐丙寅與宋兵戰于唐興大  
破之丁卯蕭達蘭與宋軍戰于遂城敗之庚午軍于望  
都

契丹國志曰秋閏月帝同母蕭太后大舉攻宋邊遣  
統軍順國王達蘭引兵掠威勝軍前鋒為魏能所敗  
又攻北平寨為田敏等擊走遂東趨保州攻城不克

帝與蕭太后合兵攻定州宋將王超按兵不出陣于唐河拒之契丹兵東駐陽城淀又分兵圍岢嵐軍為守臣賈綜擊走太平治迹統類曰契丹騎數萬入寇草城川岢嵐軍使賈綜率兵擊敗之翌日復至又敗之遂北出境時并代鈐轄高繼勳等率兵來援登高望草城川謂曰敵衆布陣不整將不才也我雖少可以奇取勝先設伏山下戰合敵必南去爾起乘之必大潰與戰至寒光嶺伏發果敗自相蹂躪者萬餘

人獲馬牛橐駝甚衆十月知府州折惟昌率所部兵自火山入契丹率州界前鋒破大狼水寨殺戮甚衆生擒四百餘人獲馬牛羊鎧甲數萬計契丹方圍奇嵐軍聞敗即遁去

冬十月丙戌攻瀛州不克

續資治通鑑長編曰景德元年冬十月丙戌契丹兵抵瀛州城下勢甚盛晝夜攻城擊鼓伐木之聲聞于四面大設攻具驅奚人負板秉燭乘墉而上知州西



京左藏庫使李延渥率州兵強壯又集貝冀巡檢史  
普所部拒守發礮石巨木擊之皆累累而墜踰十數  
日多所殺傷契丹主及其母又親鼓衆急擊矢集城  
上如雨死者三萬餘人傷者倍之竟勿能克乃遁去  
張師正括異志曰賈魏公昌朝生始數歲先令公  
為瀛幕公時在膝下契丹數十萬攻圍踰月城甚危  
急守陴者聞空中神告曰城中有中朝輔相勿憂賊  
也數日契丹遁去

冬十一月庚午攻破德清軍士申次澶淵蕭達蘭中伏  
弩死

續資治通鑑長編曰景德元年冬十一月壬申天雄  
軍間契丹將至闔城惶遽王欽若與諸將議探符分  
守諸門部鈐轄孫全照曰將家子請不探符諸將自  
擇便宜處所不肯當者全照請當之既而莫肯守北  
門者乃以命全照欽若亦自分守南門全照曰不可  
參政主帥號令所出謀畫所決南北相距二十里請

覆待報必失機會不如居中央府署處分四面則大  
善欽若從之全照數教蓄弩手皆執朱漆弩射人馬  
洞徹重甲于是大開北門下釣橋以待之敵素畏其  
名莫敢近北門者乃環過攻東門良久捨東門趨故  
城夜復自故城潛師過城南設伏于狄相廟遂南攻  
德清軍欽若聞遣將率兵追擊伏起斷其後天雄兵  
不能進退全照請於欽若曰亡此兵是亡天雄也北  
門不足守全照請救之乃引麾下出南門力戰殺傷

契丹伏兵殆盡天雄兵乃得還存者十三四契丹遂陷德清軍知軍尚食使張旦及其子三班偕職利涉虎翼都虞候胡福等十四人並死之又曰契丹既陷德清是日率衆抵澶州北直犯大陣圍合三面輕騎由西北隅突進李繼隆整軍成列以禦之分伏勁弩控扼要害其統軍順國王達蘭有機勇所將皆精銳方為先鋒異其旗幟躬出督戰威虎軍頭張瓌守牀子弩弩潛發達蘭中額殞其徒數十輩競前與曳

至寨是夜達蘭死契丹大挫衄退却不敢動但時遣輕騎來覘王師瓌壽州人也 鶚按長編云太祖初即位備庫副使魏丕治兵器無不精辦舊牀子弩射止七百步丕增造至千步

乙亥攻破通利軍丁丑宋遣崇儀副使曹利用請和即遣飛龍使韓杞持書報聘十二月癸未宋復遣曹利用來以無還地之意遣監門衛大將軍姚東之持書往報戊子宋遣李繼昌請和以太后為叔母願歲輸銀十

萬兩絹二十萬匹許之即遣閤門使丁振持書報聘已  
丑詔諸軍解嚴是月班師

續資治通鑑長編曰十一月丙子車駕次澶州南城  
寇準請幸北城曰陛下不過河則人心危懼敵氣未  
懾非所以取威決勝也高瓊亦固請即麾衛士進輦  
扣陛上遂幸北城至浮橋猶駐車未進瓊乃執搥築  
輦夫背曰何不亟行今已至此尚何疑焉上乃命進  
輦既至登北城門樓張黃龍旗諸將皆呼萬歲聲聞

數十里氣勢百倍戊寅上移御北城之行宮曹利用  
自天雄赴契丹寨見其國主羣臣與其宰相韓德讓  
同處一車羣臣與其主重行別坐禮容甚簡以木橫  
車輓上設食器坐利用車下饋之食共議和好事議  
未決乃遣左飛龍使韓杞持國主書與利用俱還詔  
知澶州引進使何承矩郊勞翰林學士趙安仁接伴  
之十二月庚辰朔韓杞入對於行宮前殿跪授書函  
於閣門使使捧以升殿內侍省副都知閻承翰受而

啟封宰相讀訖命杞升殿跪奏云國母令臣上問皇  
帝起居其書復以闕南故地為請上曰朕守祖宗基  
業不敢失墜所言歸地事極無名必若邀求朕當決  
戰爾寔念河北居人重有勞攘倘歲以金帛濟其不  
足朝廷之體固亦無傷答書不必具言但令曹利用  
與韓杞口述茲事可也趙安仁獨能記太祖時國書  
體式因命為答書賜杞襲衣金帶鞍馬器幣杞即日  
入辭遂與利用同往是日日有食之癸未利用與韓



杞至契丹寨契丹復以闕南故地為言利用輒阻之  
其國主及母聞之意稍怠但欲歲取金帛利用許遺  
絹二十萬疋銀一十萬兩議始定契丹復遣王繼忠  
見利用言國主年少願兄事南朝又契丹聞南朝或  
於緣邊開移河道廣浚壕塹別有舉動之意因附利  
用密奏請立誓并乞遣近上使臣持誓書至彼甲申  
利用即與其右監門衛大將軍姚東之持國主書俱  
還并獻御衣食物具郊勞館穀並如韓杞之禮命趙

安仁接伴東之乙酉東之入對於行宮中使受其書  
書辭猶言曹利用所稱未合王繼忠前議然利用固  
有成約悉具繼忠密奏中矣丙戌東之入辭命西京  
左藏庫使李繼昌假左衛大將軍持誓書往報聘金  
帛之數如利用所許其他亦依繼忠所奏云先是上  
謂輔臣曰韓杞與東之來皆言其國母附遠起居而  
不述其主此蓋母專其政人不畏其主也既而利用  
言東之云國母比欲致書以南朝未有緘題故寢而

不議遂并致兩書各送衣服茶藥金器等以答東之  
所獻者 蘓軼龍川別志曰景德中契丹南牧真宗  
用寇萊公計親御六軍渡河兵始交而斃其貴將契  
丹有求和意朝廷知之遣供奉官曹利用使于兵間  
利用見其母于軍中與蕃將韓德讓坐駝車上坐利  
用于車下饋之食共議和事利用許之歲遺銀絹三  
十萬匹 沈括補筆談曰咸平末契丹犯邊戍將王  
顯王繼忠屯兵鎮定契丹兵大至繼忠力戰為契丹

所獲授以職官復使為將漸見親信繼忠乘間進說契丹講好朝廷息民為萬世計契丹母老亦厭兵遂納其言因寓書於莫守石普使達意于朝廷時亦未之信明年契丹兵大下遂至河車駕親征駐蹕澶州而繼忠自敵中具奏遼主請和之意達于行在上使曹利用馳遺契丹書與之講平利用至大名時王冀公守大名以契丹方得志懼其不情留利用未遣會圍合不得出朝廷不知利用所在又募人繼往得

殿前散直張皓引見行在皓携九歲子見曰臣不得敵情為報九歲不還願陛下錄其子上賜銀三百兩遣之皓出澶州為徼騎所掠皓具言講和之意騎乃引與俱見太后蕭蹇車帷召皓以木橫車軌上令皓坐與之酒食撫勞甚厚皓既回契丹欲襲我北寨以其謀告守將周文質及李繼隆秦翰文質等厚備以待之黎明契丹兵果至迎射其大帥達蘭墜馬死契丹兵大潰上復使皓申前約及言已遣曹利用之意

皓入大名以告王彝公與利用俱往和議遂定乃改  
元景德後皓為利用所軋終于左侍禁真宗後知之  
錄其先所留九歲子牧為三班奉職而累贈繼忠至  
大同軍節度使兼侍中國史所書本末不甚備予得  
其詳于張牧及王繼忠之子從任之家蔣穎叔為河  
北都轉運使日復為從任論奏追錄其功 契丹  
國志載宋真宗澶淵誓書曰維景德元年歲次甲  
辰十二月庚辰朔七日丙戌大宋皇帝謹致誓書于

契丹皇帝閱下共遵誠信慶守歡盟以風土之宜助  
軍旅之費每歲以絹二十萬疋銀一十萬兩更不差  
使人專往北朝只令三司差人搬送至雄州交割沁  
邊州軍各守疆界兩地人戶不得交侵或有盜賊逋  
逃彼此無令停匿至於隴畝稼穡南北勿縱騷擾所  
有兩朝城池並可依舊存守洵壕完葺一切如常即  
不得搶築城隍開掘河道誓書之外各無所求必務  
協同庶存悠久自此保安黎獻謹守封陲質于天地

神祇告于宗廟社稷子孫共守傳之無窮有渝此盟  
不克享國昭昭天鑒當共殛之遠具披陳專俟報復  
不宣 契丹聖宗誓書曰維統和二十二年歲次甲  
辰十二月庚辰朔十二日辛卯大契丹皇帝謹致書  
于大宋皇帝闕下共議戢兵復諭通好兼承惠顧特  
示誓書以風土之宜云云某雖不才敢遵此約謹告  
于天地誓之子孫苟渝此盟明神是殛專具諮述不  
宣



二十三年夏五月戊申朔宋遣孫僅等來賀皇太后生辰

續資治通鑑長編曰景德二年春二月癸卯命開封府推官太子中允直集賢院孫僅為契丹國母生辰使右侍禁閤門祇候康宗元副之入契丹境其刺史皆迎謁又令幕職縣令父老捧卮獻酒于馬前民以斗焚香前迎于路側接伴者察使人中途所須即供應之其蕃漢食味漢食貯以金器蕃食貯以木器所

至母得鬻食物受錢違者全家處斬國主每歲避暑于含涼淀間使至即來幽州盛召僅等宴會張樂待遇之禮甚優僅等辭歸賜以器服及馬五百匹自郊勞至于餞飲所遣皆親信訓禮恭恪者以致勤厚之意王文正公筆錄曰景德中契丹通好首命故給事中孫公僅奉使而往屬修聘之始迎勞饗餼頒給之禮殊未詳備北人館待優異務在豐腆事或過差僅必折而罷之自餘皆為隨事損益俾豐腆中度而

後已迄今信使往復不改其制

秋八月

契丹國志曰八月有星孛于紫微

冬十二月丙申宋遣周漸等來賀千齡節丁酉復遣張若谷等來賀正旦

續資治通鑑長編曰景德二年十月丙戌遣度支判官太常博士周漸為契丹國主生辰使侍禁闔門祇候郭盛副之職方郎中直昭文館韓國華為契丹國

母正旦使衣庫副使兼通事舍人焦守節副之監鑄  
判官秘書丞張若谷為國主正旦使內殿崇班闔門  
祇候郭允恭副之自是歲以為常 隆平集曰焦守  
節以宮苑副使兼通事舍人使契丹館伴丁求說頗  
易之指遠山曰此黃龍塘也應聲問曰燕然山距此  
幾許求說慙乃加禮焉黃龍塘即契丹置晉少帝之  
所

二十四年冬十月庚午朔羣臣上皇帝尊號曰至德廣

孝昭聖天輔皇帝

朱彞尊曝書亭遼雲居寺二碑跋曰右王正智光雲  
居寺二記共勒一碑碑額篆書重修雲居寺一千人  
邑會之碑一稱結一千人之社一千人之心一稱完  
葺一寺結邑千人近年京城發地得仙露石函記後  
有千人邑三字尼曰邑頭尼覽者疑是地名合此碑  
觀之則知千人邑者社會之名耳天順皇帝者遼穆  
宗尊號丞相秦王者重元為南京留守也遼史聖宗

初即位羣臣上尊號曰昭聖皇帝統和元年六月上  
尊號曰天輔皇帝五年四月上尊號曰至德廣孝昭  
聖天輔皇帝二十四年十月上尊號曰至德廣孝昭  
聖天輔皇帝今碑建于二十三年尊號無天輔字是  
則二十四年十月以前聖宗尊號但云至德廣孝昭  
聖皇帝如碑所記至二十四年乃合元年尊號天輔  
字以稱之否則二十四年所上之號與五年無異何  
用羣臣復上乎竊疑史有誤也 續資治通鑑長編

曰景德三年冬十月乙亥以太常博士王曙為契丹國主生辰使內殿崇班闔門祗候高繼忠副之戶部員外郎直集賢院李維為國母正旦使崇儀使雅州刺史張利涉副之太常博士段曄為國主正旦使如京副使孫正辭副之

二十五年春二月

東國通鑑曰高麗穆宗宣讓王十年春二月契丹遣耶律延貴來加冊王為守義保邦推誠奉聖功臣開

府儀同三司守尚書令兼政事令上柱國食邑七千  
戶

夏五月

契丹國志曰五月朔日食

二十六年春三月

續資治通鑑長編曰大中祥符元年三月命都官員  
外郎孫奭至契丹境上告以將有事於泰山 江少

虞皇朝類苑曰契丹飛奏于歲給外別假金帛上以



示王文正公曰東封甚近車駕將出以此探朝廷之意何其小哉上曰何以答之公曰正當以微物輕之乃于歲給三十萬外各借二萬仍諭次年額內除之契丹得之大慙次年復示有司契丹所借金帛二萬事屬小可仰依常數與之今後永不為例

二十七年冬十二月乙酉南幸皇太后不豫戊子肆赦辛卯皇太后崩于行宮壬辰遣使報哀于宋

續資治通鑑長編曰太中祥符二年十二月癸卯契

丹國母蕭氏卒年五十七謚曰宣獻契丹主哀毀嘔  
血遣天平節度使耶律信寧馳騎來告命太常博士  
直史館王隨內殿承制闔門祇候郭允恭為祭奠使  
太常博士判三司催欠憑由司王曙供奉官闔門祇  
候王承僅為弔慰使賻以衣五襲綾羅布帛萬匹

郡齋讀書志曰戴斗奉使錄一卷皇朝王曙撰景德  
三年為契丹主生辰使祥符三年為弔慰使所錄也  
鷄按遼史聖宗紀統和二十八年二月宋遣王隨

王儒等來弔祭以王曙為王儒史有誤也



遼史拾遺卷七